



Memoria xustificativa dun convenio de colaboración entre a Vicepresidencia e Consellería de Presidencia, Administracións Públicas e Xustiza e o Concello de Moraña para a execución do proxecto denominado Circuito de Pumptrack para MTB e deportes de inercia

1. Departamento que tramita o convenio

A Vicepresidencia e Consellería de Presidencia, Administracións Públicas e Xustiza é o órgano da Administración autonómica que en virtude do Decreto 74/2018, do 5 de xullo, polo que se establece a súa estrutura orgánica ten atribuídas a elaboración, proposta e execución da política do Goberno Galego en materia de administración local e as competencias en materia de asistencia á Administración Local, así como o fomento das liñas de colaboración coas entidades locais.

Dentro deste departamento, as competencias en materia de Administración local están atribuídas á Dirección Xeral de Administración Local. A este centro directivo correspóndelle, en particular, o fomento das liñas de colaboración coas entidades locais galegas no referente á convocatoria e execución das subvencións a elas destinadas.

2. Antecedentes

A Xunta de Galicia, a través da Vicepresidencia e Consellería de Presidencia, Administracións Públicas e Xustiza, ten previsto asinar co Concello de Moraña un convenio para a execución do proxecto denominado Circuito de Pumptrack para MTB e deportes de inercia .

O Decreto 74/2018, do 5 de xullo, polo que se establece a estrutura orgánica da Vicepresidencia e Consellería de Presidencia, Administracións Públicas e Xustiza, configura esta como o departamento da Xunta de Galicia ao cal lle corresponde a elaboración, proposta e execución da política do goberno en materia de administración local, atribuíndolle, entre outras as competencias en materia de asistencia á Administración local.

Á súa vez, o artigo 22 do antedito decreto determina que a Dirección Xeral de Administración Local é o órgano encargado da xestión das competencias atribuídas á Xunta de Galicia en materia de Administración local e a este centro directivo correspóndelle, en particular, o fomento das liñas de colaboración coas entidades locais galegas no referente á convocatoria e execución das subvencións a elas destinadas.

Segundo dispoñen os artigos 25 e 26.1 da Lei 7/1985, do 2 de abril, reguladora das bases do réxime local e os artigos 80 e 81 da Lei 5/1997, do 22 de xullo, de Administración Local de Galicia, os concellos deberán prestar á súa cidadanía os servizos públicos que contribúan a satisfacer as necesidades e aspiracións da comunidade de veciños.

Pola súa banda, a Comunidade Autónoma de Galicia ten como obxectivo o desenvolvemento equilibrado do territorio galego, do medio rural e do urbano, do interior e da faixa costeira, que permita o desenvolvemento económico da totalidade do territorio e que a cidadanía galega teña unhas óptimas condicións de vida, con independencia do seu lugar de residencia, potenciando e apoiando a prestación de servizos por parte dos nosos concellos que son a Administración máis próxima aos administrados.

O obxectivo común é conseguir ou recuperar o funcionamento das infraestruturas municipais, de forma que os concellos poidan prestar servizos de calidade á veciñanza con independencia do seu lugar de residencia.

Por outra banda, na aplicación orzamentaria 05.23.141A.760.2 (proxecto 2017 00054, *Proxecto de desenvolvemento dos entes locais*) existe un saldo de crédito, financiado exclusivamente con fondos propios da Comunidade Autónoma, que se considera axeitado e suficiente para a súa aplicación eficaz na colaboración coas entidades locais de Galicia.





3. Finalidade

Para os efectos sinalados, tense previsto formalizar co Concello de Moraña o instrumento convencional ao que se refire esta memoria, por un período de vixencia que abrangue desde o día da súa sinatura ata o 15 de novembro de 2018 .

4. Obxecto do convenio

O obxecto do presente convenio é fixar as liñas de colaboración entre a Vicepresidencia e Consellería de Presidencia, Administracións Públicas e Xustiza e o Concello de Moraña para a execución do proxecto denominado Circuito de Pumptrack para MTB e deportes de inercia .

5. Fundamentos do convenio

O Concello de Moraña manifestou a necesidade extraordinaria e urxente de asistencia por parte da Vicepresidencia e Consellería de Presidencia, Administracións Públicas e Xustiza para acometer o proxecto denominado Circuito Pumptrack para MTB e deportes de inercia que ten como obxecto construción dun circuito Pumptrack, para skates, scooters, patíns e bicicletas, tratase dunha práctica deportiva que permite o percorrido a través da impulsión mediante a inercia adquirida nos saltos e peraltes do circuito e a propia habilidade do deportista.

A solicitude fundaméntase na necesidade de responder de contado a grande demanda existente por parte da xuventude do concello e dos concellos limítrofes dunha pista de Pump Track. A practica deste deporte foi medrando de xeito exponencial nos últimos meses e o Concello carece dun espazo adecuado para o mesmo, os xoves practícanos en pistas forestais escarpadas, no monte ou incluso en zonas urbanas onde a orografía do terreo se presta para a súa práctica, co risco de accidentes que isto supón; tendo xa constancia de accidentes; polo que está a ser un asunto de importante preocupación para este Concello, non só polo risco que supón o desenvolvemento desta actividade deportiva nunha zona non axeitada, senón porque tamén se recibiron numerosas queixas das comunidades de montes.

Ante esta nova situación, tanto veciños do concello como de concellos limítrofes, que practican un deporte, ata agora descoñecido, constatouse que non existe na provincia de Pontevedra ningunha pista destas características e, a nivel autonómico, soamente existen na provincia de Ourense; polo tanto, ademais de dar unha solución inminente a o problema de seguridade existente, a instalación dunha pista Pump Truck no Concello de Moraña converterase nun equipamento de interese autonómico, e unha iniciativa singular a nivel económico, de xeito que atraería veciños ,non só do Concello de Moraña, senón veciños doutros concellos que poderían vir a practicar este deporte.

O concello de Moraña, situado ao norte da provincia de Pontevedra, conta cunha condición xeográfica e unha localización dentro da propia provincia e incluso en relación con outras provincias, que favorece a implantación deste novo equipamento. O concello está atravesado pola vía autonómica PO-221, de Caldas de Reis a Campo Lameiro, e atópase próximo ás estradas nacionais 550 e 640 e mais á Autoestrada do Atlántico AP-9, o que fai posible situarse na capital da provincia (Pontevedra, 21 Km) en menos de 25 minutos ou na capital da comunidade (Santiago de Compostela, 40 Km) en menos de 40 minutos.

A vista dos accidentes ocorridos nos últimos meses e a importante demanda existente , xurde a necesidade e a urxencia de acondicionar un punto de reunión urbano e un lugar seguro e divertido no que se poida practicar o deporte que actualmente está mais de moda entre os nenos e adolescentes, sen que este supoña un perigo de ser atropelado por un vehículo, ou de poder atropelar a un peón, e de por en perigo a súa propia integridade física en lugares pouco apropiados. Trátase dunha circunstancia imprevista de interese social que precisa ser atendida de maneira inminente, e ó mesmo tempo trátase de implantar un novo deporte moi beneficioso para os nenos, fomentando hábitos saudables e de relación social, e así impulsar unha actividade novidosa e única na provincia.





A necesidade da colaboración solicitada á Vicepresidencia e Consellería acentúase pola concorrencia doutros factores. Por unha banda, na actualidade non hai ningunha convocatoria en concorrencia á que poida acollerse este proxecto nin se prevé a súa convocatoria nas próximas datas, dado o avanzado do exercicio orzamentario, polo custo temporal da tramitación dun procedemento destas características.

Por outra banda, a falta de recursos dun pequeno concello para poder acometer as necesarias actuacións, nun marco orzamentario restritivo, de austeridade e control do gasto público e, asemade, necesariamente estable por imperativo legal para as entidades que integran a Administración local, configuran un contexto do que se derivan, entre outras consecuencias, a imposibilidade para o Concello de Moraña de afrontar en solitario os compromisos económicos que o restablecemento do normal funcionamento dos servizos municipais, mediante a execución das actuacións obxecto de subvención, representan para a facenda local.

Así pois, este convenio de colaboración responde ao interese público e social que representa a acción de fomento da Vicepresidencia e Consellería de Presidencia, Administracións Públicas e Xustiza respecto da execución dunhas actuacións imprescindibles e necesarias para o normal funcionamento da entidade local, que lle permitan exercer as competencias e prestar os servizos que a normativa básica en materia de réxime local atribúelle aos concellos, como Administración máis próxima aos administrados.

A conxuntura descrita, a necesidade extraordinaria de asistencia manifestada polo concello e o obxectivo da actuación, así como a existencia de crédito axeitado e suficiente para a súa aplicación eficaz no restablecemento dos servizos municipais sobre os que se actuará a través do convenio que se pretende subscribir, acreditan a existencia de razóns de interese público que xustifican o recurso ao procedemento excepcional de concesión directa dunha subvención a favor do Concello de Moraña.

6. Aplicación orzamentaria e importe

Para dar cumprimento aos obxectivos deste convenio, a Vicepresidencia e Consellería de Presidencia, Administracións Públicas e Xustiza, a través da Dirección Xeral de Administración Local, achegará a cantidade máxima de corenta mil (40.000,00 €) con cargo á aplicación orzamentaria 05.23.141A.760.2 (CP 2017 00054) dos orzamentos xerais da Comunidade Autónoma para o ano 2018. Este importe representa o 87,66 % do orzamento total do proxecto que constitúe o obxecto deste convenio e que ascende a 45.631,52 €.

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, con independencia de que, ao abeiro do previsto nos artigo 4 da devandita norma, lle sexan de aplicación os principios desta lei para resolver as dúbidas e lagoas que se poidan presentar.

A directora xeral de Administración Local

Marta Fernández-Tapias Núñez

Documento asinado dixitalmente á marxe

